

ցաւ արտասահմանեան մամուլում և դրանց պատասխանատուութիւնը գաշնակիցներից ամեն մէկը միւսի վրայ էր գցում, Այդ տենդենցիօզ մեղադրանքներին դէմ Բոլղարիան իր կողմից առաջարկեց քննութիւն նշանակել և փաստերը ստուգել տեղնուտեղը՝ յանձնելով քննութեան գործը միջազգային յատուկ մասնաժողովին: Այդ առաջարկութիւնը ըէպէ կերպարանը ստացաւ շնորհիւ «միջազգային խաղաղութեան ֆօնդի», որպիսին նուիրաբերել է ամերիկացի յայտնի միլիարդէր Կարնէլին: Այդ «ֆօնդի» վարչութեան բաժանմունքներից մէկը ստանձնեց իր վրայ «քննիչ մասնաժողովի» կազմակերպութիւնը, որի մէջ մտնում էին զանազան երկիրների հեղինակաւոր հասարակական և պարլամենտական գործիչներ: Այդ «մասնաժողովի» մէջ Ռուսաստանի կողմից նշանակուեց Բալկանեան գործերին լաւ տեղեակ պ. Ն. Միլիկովը: Սերբիան մեղադրելով կամ պատրուակ ընդունելով պ. Միլիկովի բոլղարասիրութիւնը—մերժեց նրա մասնակցութիւնը այդ գործում, շատ կոպիտ և անվայել, վերաւորական ձևով արտայայտելով իր բացասական վարմունքը «Մասնաժողովը» ևս իր կողմից յայտնեց, որ այդպիսի պայմաններում ինքը հնարաւոր չէ համարում գործը սկսելու: Նրա անդամները, դրանց թուում և պ. Միլիկովը, հեռացան Բէլգրադից՝ ենթարկուելով փողոցային չափազանց անվայել ցոյցերի: Այդտեղից «քննիչ միջազգային մասնաժողովը» ուղևորուեց Սալօնիկ, բայց այնտեղ էլ նոյն բացասական ընդունելութիւնը գտաւ. յոյները—պաշտպանելով իրենց բարեկամ սերբերին—հրաժարուեցան միջազգային քննութիւնից*):

Կար. Թէմուրազեան

ԹԻԻՐԻՄԱՑՈՒԹԻԻՆԸ ՊԱՐԶՈՒԱԾ

«Մշակ»-ի նախանցեալ շաբաթուայ համարներից մէկում տպուած էր Անիի վանահայր Միքայէլ վարդապետի նամակը, որ անկարելի է թողնել անուշադիր:

*) „B. E.“

Ահա ամիսներ է, ինչ հայ մամուլը,—յանձին «Հորիզոն» և «Կովկասի Լրագրեր»,—տեղեկութիւններ էին հաղորդել, իբր թէ պրօֆ. Մարրը անբարեհաճ և նոյնիսկ թշնամական վերաբերմունք է ցոյց տալիս դէպի մեր հինաւուրց Անիի աւերակները, մենք ուզում էինք ասել դէպի իր Անիի աւերակները, որ աւելի ճիշտ կը լինէր, որովհետև Անին կենդանացնողը նա է եղել իսկապէս:

Նման չարադիտակ լուրեր մեզ ևս հասել էին, բայց մենք միշտ էլ մերժել էինք տեղ տալ մեր թերթի էջերում նման կանխօրէն սուտ ու անհաւատալի լուրերին:

Ի՞նչպէս. միթէ կարելի էր մի բոպէ անգամ կարծել, թէ պրօֆ. Մարրը, որ անզուգական գիտնականի հետ միացնում է նաև ազնիւ սրտի բոլոր յատկութիւնները, իրեն թոյլ կը տար մի այդպիսի թշնամական դիրք դէպի Անին:

Միթէ պրօֆ. Մարրի ջանքերից ու երազներից մէկը չէ եղել ստեղծել հինաւուրց Անիում մի ամբողջ թանգարան, որ մեր երկրի նախկին քաղաքակրթութեան կոթող լինելու հետ, պիտի լինէր մի կենդանի կոթող հէնց իր՝ այդ յարգելի գիտնականի անմոռաց կոթողը:

Այդ ամբողջ աղմուկը մի բան է միայն ապացուցում, այն է՝ թէ սրբան անփոյթ է եղել էջմիածինը դէպի Անին, դէպի մեր վանքական-եկեղեցական-կրօնական իրաւունքները:

Այս ամբողջ աղմուկը մի բան է միայն ստում, այն է՝ Մայր Աթոռը օր առաջ պէտք է վերականգնի մեր անփիճելի եկեղեցական-կրօնական-վանքական իրաւունքները Անիի վերաբերմամբ:

Իսկ պրօֆ. Մարրին, որի անունն ու գործերը հայ հնագիտական պատմութեան լաւագոյն էջերի զարդն է լինելու, մենք նորից մեր երախտագիտական զգացմունքներն ենք արտայայտում:

Պատմաբան

Մ Ա Մ Ո Ւ Լ

Կան խնդիրներ, որոնց մասին «Մ Շ Ա Կ» անկարելի է վիճել, աւելորդ է վիճել—այնքան նա պարզ է, ակներև:

Այդօրինակ խնդիրներից է և այն, որ համազգային տունը մենք շտօնեցինք հարկաւոր միահամուռ ոգևորութեամբ, և մանաւանդ չլաւերժացրինք ըստ արժանւոյն, թէև զեղեցիկ միտք էինք յղացել յաւերժացման համար—ստեղծել համազգային ռպրոցական ֆօնդ:

Կասկած չկայ, որ ամենքս էլ աւելի էինք սպասում, և իսկապէս աւելի էլ պիտի լինէր համազգային, համա-

ուսական հայերի ժողովարարութեան արդիւնքը:

Բայց «Մշակը» համաձայն չէ մեզ հետ, նա գտնում է, թէ մենք կարող ենք միանգամայն գոհ լինել ստացուած գումարից, որ ժողովուած է մի պատկառելի դրամազուխ:

Մենք ասում ենք և նորից պնդում ենք, թէ ժողովուած է մի չնչին, շատ չնչին գումար համազգային մի նման ֆոնդի համար, համազգային մի նման յօրելեանի առթիւ:

Պնդում ենք նոյնը և այսօր Ձէք ուզում հաւատալ, թող թուերը խօսեն, հէնց «Մշակի» առաջ բերած թուերը:

Նա ասում է՝ ժողովուել է 477 հազար, կը ժողովուել էլի մի 30 հազար, ընդամենը՝ կէս միլիօն. Եատ բարի:

Բայց այդ գումարից պիտի դուրս գալ կարապետ Լալայեանի (Բագուեցի) և Սարգիս Խրճեանի (Ն. Նախիջևանցի) կտակած գումարները, որոնք կապ չունեն համազգային տօնի 1500-ամեայ և տոյազրութեան 400-ամեայ յօրելեանի հետ և միայն պատահական գումարներ են՝ մահուան չնորհիւ դրուած էջմիածնի տրամադրութեան ներքոյ:

Մնում է մի շատ համեստ գումար, որից մի ամբողջ հարիւր հազարը տուել է մի հաստատութիւն—Պետերբուրգի եկեղեցական խորհուրդը:

Ուրեմն ժողովուած է հազիւ երկու հարիւր հազար, որ Պետերբուրգի եկեղ. խորհրդի տուածի հետ ասում է մօտ երեք հարիւր հազար:

Սա մի ողորմելի գումար է նման պարագաներում:

Երբ ասում ենք համազգային տօն, յօրելեան,— այդ խօսքի տակ պէտք է հասկանանք այն եռանդի գումարը, որ թափել են այդ առթիւ, և ո՛չ մի կերպ չի կարելի Վեհ. Հայրապետի տրամադրութեան տակ գանազան առթիւ դրուած գումարները տօնական ջանքերի արդիւնք համարել: Ուրիշ բան է, թէ մենք կարող ենք կողմնակի գումարներով մեծացնել դպրոցական ֆոնդը, և ուրիշ բան՝ թէ ինչ է ժողովուել ուղղակի դպրոցական ֆոնդի համար, յատկապէս տառերի գիւտի և տպագրական խօսքի յօրելեանի առթիւ:

Մենք ո՛չ միայն կողմնակից ենք, որ Վեհ. Կաթողիկոսը Լալայեանի և Խրճեանի իր տրամադրութեանը թողած հարիւր հազարները դպրոցական ֆոնդին յատկացնի, այլև կողմնակից, որ միւլչև յօրելեանն իսկ Վեհ. Հայրապետի բարեհայեցողութեան թողած բոլոր գումարները նոյնպէս վերածուին դպրոցական ֆոնդի և կողմնակի իսկ գումարներ, որոնք կտակով որոշ անօրինութիւն չունին, մեր պաշտպանած ֆոնդի մասը դառնան:

Բայց խնդիրը այդ մասին չէ, այլ այն, որ համագային յօրելեանի առթիւ ժողովուել է մի շատ ողորմելի գումար. և «Մշակը» ժխտում է, բացասում է այդ:

Առաջ բերենք փաստեր.—
Թիֆլիզը տուել է միայն 12 հազար.
Բագուն 50 հազար.

Ղարաբաղի Երեանի, Եամախու և Աստրախանի թեմերում, ըստ «Մշակի», ժողովուելու են 30 հազար: Այսպէս ուրեմն ամբողջ կովկասում և Աստրախանի թեմում չի ժողովուել գոնէ մի հարիւր հազար: Ահա այս է իսկապէս կովկասահայութեան ժողովուած գումարը, ժողովրդական լուման:

Պնդել թէ այս մի ողորմելի գումար չէ՝ դժուար է. Բայց ընդունենք անգամ, թէ Լալայեանի կտակած գումարը յատկապէս համազգային տօնի առթիւ է եղած—ուրեմն երկու հարիւր հազար ուերի ամբողջ կովկասում ու Աստրախանի թեմում:

Գարձեալ գումարը մնում է ողորմելի, մանաւանդ որ մի Ռոստով Նոր-Նախիջևան փոքրիկ հայկական գաղութը տալիս է ճիշտ նոյնքան ժողովուած ու կտակուած գումար, ու քան մօտ մի միլիօն վեց հարիւր հազարից աւելի հայութիւնը...

Բայց աւելի առաջ գնանք. ընդունենք անգամ, թէ «Մշակի» հաշուած կէս միլիօնը—կտակուած հարիւր հազարների հետ—ամբողջովին ժողովուել է յատկապէս յօրելեանի առթիւ, տօնական աշխատանքի չնորհիւ: Սակայն միթէ դա մի մեծ դրական արդիւնք է, որ առիթ տար մեզ պարծենալու:

Ձէ որ մի թեմական դպրոցի յօրելեան, մի Եուզուայ սեմինարիայի 75-ամեակը գրեթէ նոյնպիսի մի գումար է ժողովել:

Ապա ուրեմն...

Կրկնում ենք, կան բաներ, որոնց մասին չեն վիճում, այլ զգում են: Այսպիսի հարցերից է դպրոցական ֆոնդի անյաջողութեան խնդիրը:

Մենք մէկն ենք եղել դպրոցական ֆոնդի ջերմ պաշտպաններից և եթէ մենք արձանագրում ենք այս տխուր փաստը, այդ միայն նրա համար, որ ցաւալի էր մեզ համար մի ամբողջ տարուայ համազգային ջանքերից յետոյ հասնել մի նման արդիւնքի:

Եթէ «Մշակը» այս թուական հաշուէտուութիւնից էլ չհամոզուեց, և կարծում է թէ մենք չափազանցացնում ենք, խտացնում գոչները, բռնազրօսիկ դասաւորում թուերը, ապա թող հարցնէ իր աշխատակից յարգելի Կր. Չալխուչեանին, կամ աւելի ճիշտ՝ թերթէ հէնց «Մշակի» էջերից Չալխուչեանի գրած ջերմ նախատինքները ուղղած կովկասահայերին, որ նոյնիսկ Բագուն և Թիֆլիզում չգտնուեց գոնէ մի հատիկ հայ, որ իր անուէր կապէր դպրոցական ֆոնդի հետ, համազգային յօրելեանի հետ:

Խոստովանենք փաստը, անուրանալի ճշմարտութիւնը:

Բայց այդ չի նշանակում, թէ մենք փորձում ենք նսեմացնել դպրոցական ֆոնդի նշանակութիւնը. ո՛չ, քաւ լիցի:

Չփակելով մեր աչքերը իրականութեան հանդէպ մենք պէտք է աշխատենք—ինչպէս փորձում ենք ցոյց տալ դպրոցական ֆօնդին նուիրուած մեր առաջնորդողներու—ստեղծել մի այնպիսի հաստատութիւն—*դպրոցական ֆօնդ կամ սնդուկ*—որ աճի, վարդանայ, հաւատ ներշնչի:

Վործի սկիզբը դրուած է. ստեղծագործական ոգին պիտի լրացնէ նիւթական միջոցների պակասը:

ԲԱԿՈՒԻ ՆՈՐ ԵԿԵՂԵՑՈՒ ՇԻՆՈՒԹԻԻՆԸ

Տարւոյս սեպտեմբերին այս վերնագրով մի յօդուած էի գրել «Հովիտի» 36 №-ում:

Յօդուածիս մէջ ցոյց էի տուել այն միջանի պակասութիւնները, որոնք ճարտարապետի գանձառութեան արդիւնք էին:

Այդ պակասութիւններն այժմ հետզհետէ լրացնում են, հարկաւ նորանոր ծախքի տակ ձգելով եկեղեցին:

Բայց հիմա երևան է գալիս մի այլ պակասութիւն, որ առնուազն 15,000 ռուբլի նոր ծախք է պահանջում:

Ահա թէ ինչու՞մն է բանը:

Սեպտեմբերի վերջերին երկու օր եկած յորդ անձրևից եկեղեցին սկսեց փառաւորապէս կաթել:

Ժողոված 4 ճարտարապետները գտել են, որ՝ 1) կտուրի քարերն լաւ տեսակից չեն և 2) դարսուածքը այն ձևով է կատարուած, որ կաթոցը անխուսափելի է, եթէ նոյնիսկ քարերը լաւ տեսակից լինէին:

Շինող վարպետ Ֆրանդին՝ իրեն ուղղուած պաշտօնական հարցին պաշտօնապէս պատասխանել է, որ ինքը գործել է ըստ ամենայնի ճարտարապետ *Քաջազունու* ծրագրով ու ցուցումով:

Իսկ Քաջազունուի ճարտարապետը, ինչպէս առաջին յօդուածումս էլ գրել էի, ի վաղուց հետէ իր շնորհքը պակասացրել է Բագուից՝ ամբողջապէս ստացած լինելով հանգուցեալ Իօլուխանեանի կողմից իրեն յատկացրած 24,000 ռուբլի կտրիկ գումարը:

Կեցցէ հայկական թայֆայականութիւնը մէկ կողմից, կեցցէ և հայկական հասարակական անտարբերութիւնը միւս կողմից:

Ճարտարապետների ժողովը որոշել է առաջիկայ մայիսին եկեղեցու կտուրը քակել և նոր կտուր շինել, թէ՛ ինչ նիւթից և ինչ ձևով—ժողովը դեռ վերջնական եզրակացութեան յանգած չէ:

Նղիշէ ա. ք. Գեղամեանց

ԹԻՓԼԻՍԿՐԱՀԱՆԱՅ

Թիֆլիզի «Знакъ Тифлиса» փոքրիկ լրագրում վերջերս աչքի է ընկնում մի փոքրիկ յայտարարութիւն, որով յայտնուած է, թէ докторъ—священникъ Լեժաւան ընդունում է հիւանդներին որոշեալ ժամին, ի բաց առեալ տօնի նախընթաց երեկոներին նայլն:

Այդ ուշագրաւ ազդը չի կարելի կարգաւ սովորականի պէս և մի կողմ դնել լրագիրը, որովհետև այդ երկու իրար մօտ շղկապուած բառերի մէջ ահագին միտք կայ—անշուշտ ուժասպառ մարդկութեան իդէալական օգնութեան տեսակէտից:

Ես երբ առաջին անգամ կարգացի այդ յայտարարութիւնը, չէի հաւատում, որ դա իսկական մի յայտարարութիւն է և տպագրական սխալ համարեցի, սակայն յետագայ նման յայտարարութիւններն ապացուցեցին, որ դա ոչ միայն սխալ չէ, այլ ճշմարտութիւն. ուրեմն կայ Թիֆլիզում մի քահանայ, որ իր՝ այդ պատուաւոր հոգևոր բժշկութեան պատասխանատու կոչման հետ, միացրել է և մարմնաւոր բժշկութեան միանգամայն վեհ և սրտացաւ կոչումը:

Փառք և պատիւ մի այդտեսակ քահանային:

Բայց ափսոս, որ մի այդտեսակ զաղափարական գործիչը նստած է մայրաքաղաքում, ուր բիւրաւոր բժիշկներ կան, ուր բիւրաւոր հիւանդներն էլ ամեն յարմարութիւն ունեն շուտափոյթ օգնութիւն ստանալու:

Բայց և այնպէս Թիֆլիզում անգամ հիմք դրած այդ նորութիւնը, այդ իդէալականութիւնը ինձ այնքան է միտնարում և ոգևորում, որ իմ սրբազան պարտքն եմ համարում յարմար առիթին գնալ այցի, մի այդտեսակ քահանայի, որ անշուշտ դիպլոմը ձեռքին, ժողովրդեան հոգևոր և մարմնաւոր վերածնութեան ղեկը ձեռքին, նետուել է կեանքի ալեծուփ ովկիանը, անշուշտ լաւագոյն տենչերի և զաղափարների ներշնչման ազդեցութեան տակ:

Ով ինչ ասի, սով ինչ ուզում է ենթադրի, բայց ես մի այդտեսակ քահանայի վաղուց, շատ վաղուց ցանկանում էի իրականութեան մէջ տեսնել. և որքան բաղաւոր կը լինի մոռացուած գաւառը, ուր բժիշկների կատարեալ սով է, եթէ մի օր մի շարք այդտեսակ լուրջ քահանայ-բժիշկները մուտք գործէին մեր մէջ—գաւառիս գիւղական ազգաբնակչութեան շրջանում, ուր ծով կարիք կայ մի այդտեսակ փրկարար նորութեան, մի այդտեսակ հումանիտ գործելակերպի:

Ասել գաւառ, գիւղացիութիւն—հեշտ է, բայց ապրել նրա մէջ, նրա դառնաշունչ հեծեծանքների մթնոլորտում և մանաւանդ յաճախակի էլ չփուլել նրա հեռաւոր ու մերձաւոր միջավայրերում, հեշտ չէ ինտելիգենտ և սրտացաւ մարդու թէ գործչի համար: Այո՛, հեշտ չէ գաւառի, գիւղական բնակչութեան վճատութեան հովտում, այդ ոչ ծաղկաւէտ ճանապարհով անտարբեր անցնելը: